

四庫全書

集部

欽定四庫全書

景文集卷二十七

宋 宋祁 撰

奏疏

請下罪己詔并求直言疏

案歷代名臣奏議係寶元二年祁守刑部員外

郎時

上

臣聞王者父事天明母事地察政合而祥至道失而咎臻自然之應也然至亂之世不能絕祥甚治之代不能

無咎辭君以祥自泰故益侈而趨亡賢主以咎修德故
愈畏而蒙祉則祥無必慶咎無固凶視銷伏之如何耳
臣伏見頃歲以來災眚數見依類託寓異占同符天本
示法而尊乃有躔離流薄之變地當安固而靜乃有都
國震動之占陛下奉承郊丘歲豐月潔當蒙介福翻至
大異何哉得非事有召奸法有階隙天于宋室諄諄存
顧先幾豫慮以啟聖心欲陛下據易圖難緣微警著奮
揚剛德固執主威厭銷未萌以光丕業也臣伏讀前史

五行志以驗於今累威重譴不可不察若乃羣星流散
則民人蕩析之象也月行黃道地震州邑則邊戎窺間
臣下擅恣后妃將盛年穀且饑之兆也去年火焚興國
寺浮屠延燔藝祖神殿已而盜壞宗廟鉅器者再則神
不昭格之意也自昔災異之發遠者十數年近者三四
年隨方輒應類無虛已陛下何不暫平清慮推求其端
方今典刑設張上下提穆而臣便論危事必難取信然
陛下試一念至假有蕩析以何策安固假有饑空以何

理振救脫致窺間可任之將謂誰倘令擅恣可防之奸
有幾災異不驗國之福也苟使遂驗則陛下禦之之慮
得不素具於穀中哉然請先言其要臣聞君以操柄為
重臣以奉命為恭柄捨之則重者反輕命竊之則恭者
更僭伏惟陛下念爵賞之典刑罰之權雖覽羣言一決
宸慮無委成假借以開貴近牽制之私書稱惟辟作福
惟辟作威夫威福者天子之所以固大寶制兆人之術
臣有作福作威則害于而家凶于而國古之王者亦何

能使刑悉當罪賞皆稱功要之事出於主則納忠者有
歸政出於臣則植私者必衆傳曰倒持太阿言柄之不
可失也又曰吐珠必念言失之不可收也若夫後宮戚
里祈恩丐賞者日月不乏陛下且當斷而不聽以示至
公內省黃門給事左右亦宜數加訓勅使思不出位此
皆助陽抑陰之術也臣聞伯禹三王之長逢辜引慝宣
王成周之良思側身故能感徹神祇收還威怒回沴
氣為太和化已衰為中興陛下覽照今古至詳至熟今

變青日著中外暴聞而罪已之問不形於詔書思患之
謀不留於詢逮委遠天成虛而未答踰時越月羣下默
然間者但引緇黃晨齋夕唄修不經之細祀塞可懼之
大變人且未信天胡可欺臣誠至愚竊恐銷伏之間未
為得計也伏望陛下不以災之未應遂為宴安不以歲
之屢豐便忘荒饉普詔百執各貢所懷庶幾天下條貫
粲然先見粗舉六事以裨萬一聯寫於左如有可采續
當條陳科別惟陛下裁赦其罪姑垂省閱臣無任瞽狂

待罪之至

議樂疏

案此疏當係寶元二年祁判監鐵院同修禮書時上歷代名臣奏議作慶歷元年誤

臣伏觀右司諫直集賢院韓琦奏劄子節文臣曾將景祐廣樂記看詳備見實紀李照所造違古之樂上薦天
地宗廟臣竊聞和峴減定鍾律等見今存在欲乞特降
聖旨指揮下太常寺復用舊樂者奉勅已差資政殿大
學士宋綬等與兩制同共詳定聞奏伏緣臣自景祐元
年中曾蒙差付太常寺與燕肅等同共磨治鍾磬後來

親見李照重定律度及相次提舉胡瑗別造鍾磬臣於太常樂器粗知本末苟有所見不容隱默謹用畫一如後

一李照所造鍾磬當時只是將太府寺布帛尺一面定法改造比舊樂頓下四律伏緣李照資性詭僻辯論專

固莫非出自私意不循古法其尺約長王朴尺二寸其

斗法以六百二十黍為一龠六龠為一合

自古合龠為合今頓差四

合十合為一升十升為一斗謂之律斗其秤以一升水

之重為一斤

比今太府見用官秤一斤零十一兩

十斤為一秤

今太府以十六斤為

秤

謂之律秤又減鍾磬十六枚為十二枚

自古經史中無十二枚為

一

其鍾之形狀竝不依典故聲韻遙長掩遏羣樂又李

照自造大筚篥亦充大樂行用皆愆憲新聲不依古

制及有新降到雙鳳管樂工吹之竝不成聲李照雖自

稱曉達音律其實與伶官賤工識見無異遂敢敗壞祖

宗以來舊樂使朝廷以不法之器薦見天地祖宗四海

傳聞莫不竊議只如照所定黃鍾之管乃是南呂倍聲

欽定四庫全書

樂文恭

五

舊黃鍾九寸正聲卻降在太簇夾鍾之間其太簇商聲
君聲君位也今君聲降在臣位羽聲來處尊宮三年有
餘於理尤害天災人事不合常理皆不祥之大也如此
數事人無愚智所共明知陛下沉深達律呂可以斷自
聖慮便從改正應於李照曾奏請添損者並違經背古
乞如韓琦所奏一切皆令停罷盡復祖宗舊制

一太常寺舊樂本自唐昭宗時雅樂散亡器無子遺尋
有博士商盈孫參約典故更造鍾磬其後五代相傳習

而不改至周時王朴重定尺度畧加添正太祖朝又詔
和峴以景表尺重加磨治稍令聲下昨緣景祐二年燕
肅始乞修正樂器其時只得王朴律準又無王朴所定
律尺律管參驗音韻而燕肅只據律準與鍾磬見聲按
定高下即是此太常舊樂比王朴時已自不同況和峴
減定後又經真宗朝景德中李宗諤一次修飾至燕肅
凡經三度磨鑢然俱不先立尺度律管所以後來無處
根正法度音律然其舊器傳至唐末祖宗三聖無人輕

議用之薦享八十餘年雖非的然如舜韶周武法度明
備要之沿襲本末實與典禮最近非同李照率意詭妄
製作不經今若陛下且以考舊典差近法度即乞先取
景表尺裁鑄律管以按王朴律然後和峴當時所定聲
律高下確然可見況舊鍾尚有七百餘枚係本寺收管
畧加磨鑢令與聲律相協所有舊磬為照定樂時盡底
畧截破壞無見存者若且將李照所定石磬自太簇以
下刻磨長短亦與舊樂黃鍾以下髣髴相近及將本寺

磬朴二百餘片相兼添補亦可諧合音律與鍾粗得三縣即可於將來南郊大禮前一時了畢不過數月便可見功其餘絲竹諸器只是移正聲調便成雅樂況禮樂之本出自天子今陛下天縱睿聖通知音律復古順道何所致疑伏乞即下有司速令修復以謹善述之美

一景祐三年詔令臣監領胡瑗鑄造鍾磬一架臣伏見胡瑗曉算法能將先儒所說黃鍾管內八百一十分為方分算法並與鄭康成周禮注及班固律歷志古法相

合自隋唐以來諸儒辨論黃鍾一龠之法皆不及瑗相
次於雜物庫請銅鑄之時忽於雜銅內得古鍾三枚即
不知甚年及是何州府納到臣與故翰林侍讀學士馮
元即時驗認其鍾古質精妙項鑄皆有廉隅上有三十
六乳餘外琢雲氣為飾有兩樂之制如鈴不圓正與周
禮所說形制相符一鍾破損二鍾尚可叩擊遂仔細洗
滌於鍾上有篆文兩行其篆亦字體古簡推本其文不
是近代所造乃是漢魏間所用者其文曰越作朕皇祖

文考寶和鍾越思萬年子子孫孫永寶用享凡二十二

字臣與馮元商量此既古器又合經典

除三十六乳與鄭康成說小異

康成以為鍾每面三十六乳即一鍾合七十二乳

遂畫圖樣進呈後一面勒令

胡瑗悉依古鍾形狀制造新鍾成一十六枚其胡瑗所

定律尺律管比王朴鍾只下半律鍾磬甚得諧韻其時

不曾許當面進呈遂只送太常寺收係即目見在後來

又蒙別差官詳定李照胡瑗等律尺管其時議者皆云

胡瑗寶龠之黍或有大小不同以為未盡合古遂抑而

不行至於八百一十分之法則盡以為然無有非者臣以為胡璣之尺黍雖有長短大小之差未盡合古然比舊樂又近法度如更使諸儒略加論討庶可施行而合雅正矣臣又竊嘗謂陛下用心詳定雅樂之日獲此古鍾乃是瑞應因此若便定律尺律管使諸儒極意論難從其長者定為尺法然後作鍾石以聲之有何不可而前來議者固執李照不法之器以為此樂已經郊祀天地不可輕改更候有知音者然後改之且祖宗舊樂相

傳八十餘年經真宗東封西祀一旦為李照狂妄率然
敗壞卻無輕改之憚今欲依據經典裁正律度反以為
更候知音假如今世遂無知音則是李照不經之器便
傳後代取笑千載此亦陛下昭然可判議者之大謬也
臣以為陛下既自明律度不須更以知音為言夫知音
自古難得非獨今也若世無夔牙則且當以法度自據
雖有清濁高下其失不遠故臣願陛下只將胡瑗八百
一十分之法詔取上黨拒泰擇其中者差一二精力宮

官及左右一二信臣於宮中重加校定陛下因以餘暇
親臨制決泰定求寸寸定求尺尺定則律度量衡四物
皆正矣然後依古法將新尺試以推步晷景若合此一
不謬也試以新管理地候氣氣候若應此二不謬也然
後可以遂頒天下明告以律度量衡之法因之修定雅
樂詔當今稍知音律經術者同加討論事無不齊然此
一事雖非朝夕急政陛下能以萬幾之暇慮而定之亦
千載不刊之美也其有先獲古鍾恐禁中忘記當時進

呈圖樣今再畫到一本隨狀進呈右謹具如前臣以儒
史為業合為文辭數啟又緣臣久在病假既不獲乞上
殿面奏今來事涉辯論不敢修飾文語貴要暢盡事理
是敢直說本末謹具狀奏聞伏候勅旨

論乞別撰郊廟歌曲明述祖宗積累之業

歌詩之興尚矣自陶虞而上書逸其傳商頌概有存者
而周詩大備竊聞班固之論也以為商周雅頌上本有
娥姜嫄降乙履敏而禹稷始生元王公劉古公太伯王

季姜女大姒作合之德乃洎成湯文武受命武丁成康
宣王中興下及輔佐伊尹周召太公申伯召虎山甫之
屬靡不褒揚既信美矣聲始歌詠而施及金石洋洋泚
泚遂盈塞乎天地之間使後世子孫有以祖述稱頌而
據之無極也孤秦亂剝禮亡樂缺逮漢六世始立樂府
采詩弦誦多舉司馬相如之屬造為詩賦畧論律呂以
合八音之調然其郊廟歌詩未有祖宗之事又不制雅
樂有以相變盛德之音寢以失章史官追憤深詆其非

南北霸雜音謠哀怨儷篇促節以雕蔚相矜唐家累盛
頗憲前烈詔禮於野綴樂於旒然至郊廟詠歌亦止一
時之事麗不逮鄭正不入雅累句庸音商周之風衰焉
安巢挺亂正聲兼失或入河海或淪坑谷宋興承五運
末流繼千載紹業受命之始日不暇給故未遑協律之
事而樂正禮官又非夙儒故老制作之懿久無聞焉雖
薦侑大禮別製辭曲然皆襲沿舊體未始改為遂使祖
宗耿光盛烈幽伏槁簡天命靡昭以為神羞而武穆文

孫春秋助祭但習容典不知王業之艱難誠可畏也臣
樸野竊微不達故實竊惟太祖武皇帝推閔位膺正統
撥亂侮亡以黜不端東纓吳越右攘蜀壘大去荆雠焚
伐蕃酋士無離傷邦用底定罷諸道節度以絕僭萌收
天下精兵以強京服太宗文皇帝鋪敦武旅遂定并汾
分遣良吏綏靖萬國斂才懋官內經百度平租躬藉以
賙四人貶成讓德卒罷封禪肆我真宗紹休聖躬於是
匈奴穿塞侮略邊郡一戎啟行射殪名酋六羸遁去厥

角請罪然而不念細故許其歡盟休寧北方於今是賴
而又進妙道迪靈篇柴奉高濟汾河景光瑞福歲蕤
習臣所不能盡道商之發祥周之監觀方茲茂矣然而
清廟詠歌但紀寅恭淳濯之細不推積德累功之本千
品萬官靡所寄言故臣願陛下萬幾之餘取三聖寶錄
據其武功文德在民耳目尤祥極瑞非人力所至者鋪
蔡發揚作為歌詩別詔近侍略依生民公劉猗那長發
之比裁屬頌聲使被金石尚體要而去浮麗根中和而

金匱要略卷之二十七
矯淺誣使言質而易曉理懿而行遠俾天下昭然知祖宗造邦濟世之勤子孫無滿假怠遑之志臣下有祖述奉揚之美超唐軼漢遂躋三代寧不盛耶

論精選太常樂工及募能知音者備太常官屬

昔虞舜命后夔典樂教胄子其言曰詩言志歌永言聲依永律和聲夔亦曰於予繫石拊石百獸率舞自周以上胄子出於公卿聲工皆有明德其為樂可以道古其為舞可以動容故能來格祖考而同合天地道衰官失

政移諸侯制度陵僭音曲曼靡然且晉有師曠魯有師
乙判南北之風執商齊之宜援古驗今若合符節其後
士人則漢有京房魏有杜夔晉有荀勗隋有鄭鐸唐有
張文收祖孝孫雖未能考正中聲以盡善美其推本律
呂有足稱道自梁訖周尋亂不厭猶使王朴竇儼緒求
墜韻袞合遺器累黍定尺造準寫聲求七均叩五音以
成八十四調儼又著大周正樂一百二十篇雖廣而不
要雜而無類苗莠相敗雅鄭同儕然禮失求野或有可

米而宋興達者尚未聞焉臣謂古之所以為工者皆精敏之人後之所以為工者皆興廝之賤古之所以總司者材堪責任後之所以總司者官達則遷樂不逮古責於何有比來諸工尤為淆混或坐區賈子或力穡農人苟避乎丁咸求著籍未識所習况責所聞族居州處兀如牆面雖誨以六樂教以二南亦不能諧神祇和邦國矣朝家丕纂謨烈咸事俊良必不借才無容慚德顧求之任之未至耳且一日失官尚及於死三年廢樂曾何

不壞故有其人則樂存無其人則樂息昔周官盡在武
坐且或失傳漢準具存律家莫能取定又況年禩綿曠
器用淪亡賢者恥而不精鄙夫濫以安處而望樂正雅
頌奚由致哉臣願陛下明下詔書且募天下知音之人
秩以微祿使備太常官屬賒其歲限寢使討論擇其所
長以備闕典又按舊令太常諸工取年十八以下資性
可教者使滿定員明立章條以判勤惰如此則不過十
稔官修事備以須陛下功成作樂矣

乞禁便俗字

伏見朝廷每有冊書詔令布下四方而便俗作字不據
經古及題署宮殿率多訛畧萬民所察百官所瞻誠非
其宜類不可悉舉臣且一二言之今之勅字乃古勞來
之勅音賚自唐以來習而不悟今若改以為敕義亦無難

議者便謂行之已久變必驚俗此非通論也昔隋唐詔
敕以髻為替移之字後因顏師古摘發其謬始議改焉
則當時以髻為替猶今以勅為敕夫髻替雖謬尚是一

音勅敕相訛遂乖兩讀自宜稽古改從本體宮殿之署
標榜高嚴遠人朝覲注目觀仰學在四夷亦不可誣漢
承相蕭何自題蒼龍白虎二闕後世署書乃由何始當
時立法寧苟簡耶且如今紫宸垂拱常所御殿而殿字
從屍從父今之左偏遂尸下作共垂字從土今乃作山

紫應從此今書作此

此俗作此

宸應從辰今書作辰

辰俗作辰

閣

門以西為西外龍門以左代豈如此之類不得不改及
詔制之語以本音為本以母音為母以檢音為檢以開

并音為闕斯則字訛音變尤難行遠臣聞太宗皇帝常詔
右散騎常侍徐鉉考正說文鉉之言曰若乃高文大冊
則以篆籀著諸金石至於常行簡牘則草隸足矣當時
謂鉉為知言臣愚以為詔文冊詞府號官稱宮室題榜
皆當垂示史冊非尋常簡牘之類願下大臣討論文字
更俗隸之失求篆籀之真昭示有司斷從正體

論國忌

伏見列聖忌日沿唐之舊百官伏閣慰訖咸詣寺觀跪

伏齋贊謂之行香仍置神位進奠疏饌臣竊思之禮尤
不經方外之言本以懺罪求福誘訓迷妄卽樊委巷不
達死生之變故於喪葬亦或用之至於朝獻帝範非若
匹夫下俚可行之也臣愚不敢遠敷國家積累之慶且
自太祖而下豐功鉅德家至戶曉生為睿明歿為上神
何福之求何罪之懺求於非福則是諂祭懺於無罪則
是誣親沿事索理謬悠可判且其謚在金冊主在清廟
每春秋享祀前誓有司齋戒奉之濯濯潔之禮以相儀

樂以節步尚畏不闕以為非馨今乃緇毳羽衣輕接光
烈熟具粗餼以希迪嘗使在天有知其不能下而臨享
也明矣願罷忌日百官行香及撤去所設神位必若國
家難於驟改則每及忌日止令道釋二家自率其徒薰
夜誦唄列為疏奏間遣一使馳詣陵寢焚之以伸蒼黔
謝生之報庶幾近於禮歟

乞置太廟神御庫

待制
日奏

宗正寺奏為趙希言劄子奏太廟內神御物有螭頭冊

盞牀燭臺等不用之物甚多約金萬餘兩銀八千兩乞
差官別為處置所貴盜竊不生奉聖旨令宗正寺相度
擘畫聞奏寺司檢會太祖室內有黑漆盞二隻元有折
拽下裝釘痕見在欲乞將不用者盞冊牀四十餘件及
螭頭等依太祖室內素盞折拽金銀所有竿杖並乞依
莊穆皇后室內神帳法物焚埋狀後中書批送禮院詳
定臣謹按神御之物在祖宗之時其數尚少故就致夾
室不須他處及時歷三聖崇奉並恭而寶盞鉤牀充滿

二室今趙希言及宗正寺乃欲除合用器物外盡乞毀
拆焚埋以防盜竊質之禮意殊未得宜且天子宗廟之
重以金銀崇飾神御尚畏招致盜竊不知官司何用條
禁何施況非時毀損驚動羣議又未必合祖宗神靈之
意竊尋周禮有天府掌祖廟之守藏寶物世傳者皆在
焉伏詳今廟地狹隘不可別為庫室欲望以宗正寺西
偏南直太廟即宮闈令廨屋其地雖小可建大屋十數
間將神御不用之物悉移置於中號為太廟神御庫令

宗正寺一就管掌責無毀瘞兼合舊章其灼然有敗爛
什物卽乞焚埋使無褻瀆取進止

景文集卷二十七

欽定四庫全書

景文集卷二十八

宋 宋祁 撰

奏疏

乞開治潁河

案歷代名臣奏議係慶
歷二年祁知陳州時上

臣知壽州日伏見本州安豐縣有芍陂自古所傳元引
龍穴山水及潁河水入陂每歲灌田萬頃近年多被泥
沙淤淀陂池地漸高蓄水轉少龍穴山一派水源既小

今來只藉潯河注水入陂後來潯河一道水渠本縣又不修開遂至水道埋塞陂水淺涸臣自到任後併值二年乾旱去年自六月放竭陂水只是救灌得側近一二千頃是以壽州米價踴貴官私妨闕臣竊聞得壽州正是出米之地全藉此一陂舊來陂水若滿常無乾旱是以縣名安豐蓋取此義臣欲乞朝旨直下本州委知州通判親往陂上相度開治潯河令水渠深快于潯河內築隄闌水入渠注滿陂內高築陂岸及重開掘陂內淤

浚之處令稍深濶其工亦不甚多只乞就來春農隙之時少借隣縣并本縣人夫三五千約工一月可見次第如陂水滿足則溉田萬頃永無凶荒兼得陳穎至京都一路官私米斛有可供應取進止

言三路邊防七事

案歷代名臣奏議係慶歷三年祁為禮部郎中知制誥時上

臣聞病者療之未危火者防之未燃若已危已燃雖有嘉醫力士猶不能振殂爛之苦是以思患預防所趨一馬臣伏見河北河東陝西比年騷困契丹規掠塞下求

索賂遺陛下以天下為心屈已忍忿與之通好心紆倉卒之急是以河朔生靈宴然暫寧此陛下權時之宜也夏賊逆命襲金明殘麟府破任福敗壞多殺吏卒數十萬轉食屯兵于今五年士氣喪沮每聞金鼓之音皆股戰膽銷有百走退生之心無一前鬥死之志部署鈐轄位均勢侔不相統一賞濫而不實罰弛而不行上下相蒙徼一切之幸臣計二陸之憂比病與失可謂將危而且燃也中外有識無不寒心臣愚以為不速興而救之

事一蹉跌悔無及矣伏見中書門下樞密院日入奏事
遵奉常體但以官吏差遣使臣遷轉比例高下計較錙
銖下至百司冗屑中請無不關白聖聰及宣敕行下一
署曰聖旨至于邊境措置安危大計反不暇及之臣愚
無知竊以為過夫不當行而行是為徒行當憂而不憂
是為必憂今耶律君臣包禍就毒故馬放陰山之下待
隙而動彼其旋玩河朔如股掌之上責貨不已又將責
地禍根釁萌章章如此朝廷忽而不防未知何謂耶方

今河北河東不澄濫官不開冗兵帥之才不才未嘗擇
械之可用不可用未嘗選自敵使繼至便謂信誓可憑
謀臣高枕了無為備可謂發篋啓筭以待寇攘今陛下
盛德清明大臣方正協力獻可弼違朝無間言不於此
時側席嘗胆思所以禦之之術急除弊政圖刷大恥乃
欲優游自暇日安一日待病之危待火之燃救不晚乎
夫碎目雜務非宰司職事假令此等一皆不問委之有
司尚無繫於治亂若二敵挺變更相影瞞一出于北一

援于西國疲于轉輸一失饑豎興為盜賊憑高呼叫環數百里則天下安危決于一日之間推是而言臣所謂不當行而行當憂而不憂果可信也劉平石元孫輕脫寡謀徑與敵鬪師敗身死損辱國威今之為帥不鑒前失尚守舊體終無改更其出師也無鼓旗則號令不行矣其戰也無行陣則敗走不救矣其止無營塹自守其行無輜重自隨烽候不明間諜不設不量人事不察地形將不撫士士不識將遽代紛紛未始暫寧而有司據

例換移習不為怪是以敵小入則小勝大入則大勝亦未嘗聞朝廷求所以敗所以勝之由彼所長我所短之要何者有勇何者有謀而可以相輔若何則守若何則戰而授之成算兵若久而不解何策以支食若有時而乏何術以濟今陛下未以為念大臣未以為言天下安危誰任其責臣聞識見隘陋不足與權大事竊謂當今之急者有七一曰講軍陣二曰廣牧馬三曰精器械四曰力耕桑五曰擇官人六曰重賊法七曰籍游冗臣既

構昧知其大而不得其詳又不敢掩衆謀申獨見伏願
陛下試以閒日詔一二近臣出此七事令共力探討使
引古驗今執處其要陛下與大臣擇而行之既行又執
而不遷浮議撼掘且皆勿聽然須迨者三年有成遠者
五七年十數年而成陛下安心緩慮總其銜勒夫治國
若種樹非謂朝種而暮可庇也假以日月則根柢深固
坐獲茂陰昔孟明再敗秦師歸脩國政晉避其德遂霸
西戎今若力農繕兵日夜申儆張吾百度振吾六師其

居有備其行有法彼二敵聞之必且狡謀潰于其胸陰計爛于其脅矣臣又願陛下詔中書樞密院自今以往取有司申請不干大事者許依唐時堂帖之比直令堂判院付之有司雜務已有定例便行不奏其可以蠲除歸有司者定為永制俾之奉行若其大事非臣下可得專者然後奏請自然綱提領攝事亦希簡使大臣得專邊境盡慮金革矣諸路部署以下出兵之日臣願依軍法以一階一級交相統制令一則易行官專則有威無

令貴臣監軍牽制其內將之與士既相習熟則不可數
為替改使得恩結其心威統其違緩急與之生死乃可
為用此其畧也昔楚莊王區區之諸侯踞卑濕之地無
日不討軍實而數之具戒于國中曰人生之不易禍至
之無日用能服鄭宋抗強晉威震中原況陛下擁四海
之富攬天下俊乂與之圖事耶然時哉時哉不可緩已
臣愚懸不識禁忌惟陛下哀憐省納

減邊兵議

案歷代名臣奏議係慶曆
中祁為翰林學士時上

臣本書生不當妄言兵革但以事勢料之參驗今古有
灼然易了者敢為奏請臣伏見自古以來防邊守塞未
有屯結兵馬經年亘歲常在城砦無有休息者傳曰久
暴師則國不足雖有智者不能善其後只如秦漢時與
匈奴更相酬報出入鈔掠亦是兵罷即歸不令屯結亦
不如聖朝長令兵馬守備邊上既不出攻坐費糧運是
故用兵未及六年天下之財已告匱竭良由邊將不知
休兵朝廷不授成算億萬之費耗散而不計若更十年

未知多少財用可濟其艱臣請言其驗敵界自三月後
馬瘦放在草野不能負重關陝人皆知之則背春向夏
敵不能大舉其驗一也敵無餽運每入漢界嘗因糧于
中國中國自三月以後纔有麥熟其餘禾稼未成無糧
可因敵不能大舉其驗二也又有高山大川溪谷相衝
春夏之後雨水時行霖潦為阻敵不能大舉其驗三也
是敵兵銳于冬令而屈於秋夏其勢可見臣欲乞朝廷
詳度許令於沿邊州軍城砦每年自三月後抽減一半

兵馬入內地州府就糧直至九月却往元駐劄處號為防秋況所抽兵士雖在內郡具校習訓練一如邊上此乃事之至便不足多疑一則邊上州軍愛惜得年支糧草二則兵馬有休息之時三則兵士到內地州府亦為裹費四則關陝之民免得轉般糧食是邊上一年支準可展為二年也識者必難臣曰敵知朝廷自三月後抽退兵馬必選擇壯騎精兵出人不意入來漢界作過恐大段深入鈔掠人民破蕩城砦何以為備臣對曰假如

敵人有壯馬精兵能于盛夏入漢界作過三五日只是鈔掠得界上些小熟戶人民且無糧草可食彼又不會攻打城壁朝廷但只令所在城砦堅守不出兵及州軍只增城立柵相對不與之戰則見在一半人馬已是足用萬一敵人竟敢謀深入即令內郡就糧兵馬旬日內可以勾集令大將將數萬之兵結陣徐驅往彼救應亦只令硬砦相持勿與彼爭鋒使之進則不敢退又粘逐常擇便地自逗留至二十日以上彼必有糧盡或雨水

之阻又何能破蕩城砦大段深入也但自來朝廷不肯
明下成算與邊將令抽退兵馬是以邊將畏避責罰長
要占留在邊上圖常有準擬其添到軍馬以死固執無
因肯減一人一騎今若朝廷明降成算使之遵守如敵
非時入界萬一有少敗劒朝廷自任其責自然邊將必
無固執斯議者也伏望降付中書樞密院子細商量取
進止

乞專刑賞狀

案歷代名臣奏議係慶歷
中祁為侍讀學士時上

臣聞天子之所以能制四海役萬民而臣之者其柄有二曰刑曰賞而已洪範曰惟辟作福惟辟作威惟辟玉食臣有作福作威玉食則害于而家凶于而國昔宋子罕謂其君曰慶賞賜與者民之所喜也君自行之殺戮刑罰者民之所惡也臣自當之於是宋君失刑後為子罕所劫且子罕纔得一柄已為主患况兩得之哉伏見陛下恭儉仁厚憂勞聽斷細務小物一更聖心近世守文之主未見其比然而任用臣下主柄外移委棄刑賞

不自總攝凡有所進必待臣下之譽而用之凡有所退亦待臣下之毀而黜之夫毀譽行于上則朋黨成于下且黨人所惡能得陛下之法而罪之黨人所愛能得陛下之賞而官之則舉朝之人重私賞而輕公法舍其君而歸其臣雖欲無危不可得矣龍之所以能飛霄漢入淵泉變化不測以風雲為之衛也虎之所以能搏百獸神空山以爪牙為之使也使龍失風雲則鱣鮪等其靈虎廢爪牙則麋鹿角其能君失刑賞則見輕于天下矣

況今四夷交侵師不用命財匱民怨吏以苛刻相挺官
以黨羽相營陛下何不收取二柄而自用之假如罰不
當辜人猶知畏賞不值辜人尚知恩又況陛下之德之
明其賞必善其罰必罪耶魯國政在陪臣春秋為諱之
稱之曰盜況擁九五之丕構總天下之機矩倒持利劍
以資斷割忽洪範之至戒襲子罕之覆徹輕龍虎之神
威抵春秋之所諱召袁促亂何所利哉比年以來日無
盛光月行黃道氛霧無時河決地動皆下侵上上失權

之應也伏望陛下上揆天神俯觀人事收威福以在手
破羣黨於私門奪乾剛擊雷聲行之一日天下廓然矣
臣蒙恩深厚不致愛死輕進替言惟垂裁赦

乞知州轉運使三年理一任劄子

妻歷代名臣奏
議係慶曆中祁

為侍讀學

士時上

臣伏見比來知州轉運使未曾在任得滿三年民間利
害及簿書文移未知次第卻已遷換迎新送故上下告
勞臣不知朝廷設官欲為理耶如不為理臣故無可言

者若欲為理安得用此敝法守而不改今審官院差遣
不行便奏請京朝官情願二年一替且差遣得行一司
之暫利也還換不定天下之大害也故敗國家大計使
吏奸得行生民無告無出于長吏數易也臣愚以為方
用兵時財用調度多出于民知州轉運使不得人不能
集事伏望普令臺省近臣舉知州轉運使五人轉運使
知州三人有材幹者以上或已在任亦許就舉充數理三周年為一任
不得只理三十箇月每歲轉運使索取知州功過并自具功過申

尚書考功考功逐旋聞奏請別近臣為考課使精加考較若三考俱優改一官知州升大州轉運使升上路三

考俱劣黜一官知州降小州轉運使降下路二優一劣

改一官二劣一優奪半年俸大約以此為率

以上賞罰并舉主用

生減一等舉主待以數人賞罰相除

其提點刑獄使者通判並此類此年

考只令中書門下及審官院揀選充職取進止

如何施行其優

劣格臣乞差官領下

乞減稅劄子

竊聞山東關中京西河北去冬無雪宿麥稀種居者愁
困去者流離綿春跨夏搏手無望朝廷雖切勅長吏漕
運鄰粟然而財用久屈倉庫半空僅能濟軍何暇及物
今州縣惟中户以上尚且懷土以待有秋而繇役百端
科率千計必不可損須出于人以臣料之私蓄有涯官
用無際歲既未足民胡得安陛下若不曠然垂恩有以
大慰其意則蚩蚩之衆飢弱者就死強惡者為盜盜賊
既廣討捕必嚴兵盜相拏邦國深患臣愚以為方今艱

食之際其災傷州縣且詔豫減今年秋夏二稅安集居民更令力農無失生業推主上之惠置黎人之心羣心苟和不逞自息權救時急深適事宜取進止

乞脩復陂塘古跡劄子

葉歷代名臣奏議係慶曆中祁為侍讀學士時上

臣伏見邊鄙用兵以來所急者莫急于食食者出于力農而國家未嘗留心于農事天下郡縣雖有陂湖塘堰例不修營轉運使知州通判但帶勤農之名畧無其實及知州通判令佐結銜兼隄堰溝洫習以為常亦不復

知是何等語是以農困食艱通天下計之常無一年之蓄且天下無一年之蓄古語以為國非其國況今大兵在外水旱難調脫若災儉相仍臣知國用盡于軍興則力耕之人餓死不救羸老委溝壑少壯為盜賊貽患國家非細事也臣欲望朝旨專下轉運使知州通判令佐等嚴行曉告使于部內各按求陂塘古跡可以利民救患者並令收復量率夫力限日計功如能不擾村鄉久遠利濟並與理為勞績優加酬賞若因此取受騷擾農

人所犯一疋以上乞追官勒停十疋以上仍除名終身
禁錮以上如可施行乞詳定條禁又條制舊有五戶各
一保宜申明此條令力農之家五家相保其中如有惰
丁游手不事桑柘不勤五穀田疇荒閒者並許本保申
舉官司明行科罰遷配遠州其勸農業者國家每一
二年畧行優卹或少放正稅分數或免戶下差科月日
自然人務農業國計必充取進止

乞損豪強優力農劄子

臣伏以摧豪強惠小民王者政教之美也今天下力農
之人國家衣食取辦然赦恩未嘗有一言及之豪猾兼
并之家居物逐利多蓄緡錢至三五十萬以上少者不
減三五萬滯泉貨使不流通美食高枕坐視朝廷財用
之急不肯以一分毫佐助公家臣以為此奸猾之民皆
國家所宜禁切陛下至仁止令入粟與官然所得至寡
不濟國用臣愚以為請自京師及天下應有物力人戶
計直及錢一萬以上者官司明諭詔旨使令百姓各指

實自言有多少見錢及他物實若干數目先作簿抄上
然後官司普令十分中官借二分助軍錢許于所在送
納仍各逐家給付州縣帖開坐數命候將來邊鄙罷兵
日並支還象牙香藥茶鹽許百姓任便于京師外州清
算其所借到錢于逐州縣置彼處所出百貨輕齎入京
付權貨務減市賣收錢仍別立庫存貯以備軍需緊急
如此錢稍有次序乞朝廷下詔普減天下租稅三分至
一半以下以明國家損豪強優力農稱物平施之義

乞停開溝洫劄子

臣伏見景祐編敕應天開封府界宿亳曹單棣許陳蔡等州溝河逐縣令佐如能在任多設方畧勸誘部民開道通流別無時雨渰潦田苗並許批上厯子及本處保明聞奏令佐與參選注家便官臣昨知陳州日體間得諸處縣令主簿為見有此條貫只是逐年一度差公人下鄉取責戶長等狀稱勸誘到百姓開導溝洫河道並得通快別不渰損田苗文狀申縣本州據縣狀批上本

人厯子得替日依例保明便該參選注家便官其實每
年無一户一工曾開治溝洫本官亦不曾按行勸誘所
有每年渰損田苗放卻二稅卻稱是外處橫水入界致
渰殺田苗不是本處雨水渰潦似此不惟選人僥倖顯
屬冒罔朝廷臣愚欲自今後停廢上項條貫更不行用
今日以前已在銓參選入乞不追改取進止

乞復符節官劄子

符契之信天子所以拱斂威重檢防邪偽其在兵賦尤

重自周官鎮圭以召守牙璋以興師漢氏始興郡國為
竹使符以代牙璋光武中興禁法疎簡但以璽書發兵
于是杜詩建言以為事有煩而不可省費而不得已請
復虎符絕紆端朝廷更從其議魏晉訖唐固不遵用惟
五代蹙弱州國褊近旦命暮達不容有詐于是周顯德
六年始去符契專以印章為驗國初受命方事之繁急
予濫定未暇修復方今地大師衆巧譎寢萌承平既久
民不知戰緩急邊陲有警而詔文單下誠恐細人間牒

奸詐模寫乘機徼倖稽逗期會無以察知則國家亦當
居安思危先事立制奪邪人竊發之便願復符節官以
明慎國命凡發兵百人以上財賦百萬以上皆待符與
詔書雙下使郡國合而後遣百人百萬以下則符契特
行焉據為大信誠有國之要務其符之形製乞下有司
詳按舊典施行

請募民入來京師劄子

去年江淮二浙稻收七八而淮南饑疫之後戶口寢衰

縣無完村村無全戶纔足自贍罔能及他惟有江浙二
方天下仰給臣以為京師禁旅近數十萬三年之蓄不
可不備去年國家垂憫南土邁茲薦飢減漕粟之常科
軫斯人之艱食上恩雖美邦計未充且足食足兵乃可
治國我倉我庾所以為人夫江淮漕運之司輸米上供
已有定數若更多取則官司不供故臣願陛下明下詔
書募民能入米京師者倍價而糶三分其價一分給錢
二分則以方糴茶準其直而與之商旅利于化居吏卒

緩于程督如此則倉廩實京師盛郡國安矣如允所請
乞付外詳議

讓轉左丞劄子

右臣今月十八日本州進奏院遞到官誥敕牒各一道
以唐書了畢轉臣尚書左丞聞命驚懼不知所舍臣自慶
歷中受詔纂修與諸儒討論首尾纔及六年使值臣差
任出外雖蒙朝廷許將史草自隨悉力編纂其如極邊
事務荒廢轉多皇祐中史未有緒蒙朝廷差歐陽修分

總紀志與臣共力臣任益州日煩差使臣督趣列傳殘
卷及移鄭州又蒙遣編修官呂夏卿乘驛就臣商較同
異催促了當歷一十七年書克奏上書成淹延職臣之
罪至如歐陽修撰列紀志等衆篇各有法度方成一家
范鎮王疇以下謨次精該一代大典非修等不成臣去
書局已十有一年修撰之時不與諸儒研確成書之日
又不與伏奏殷廷臣于修書之勤十不得一二若然臣
有稽延之罪無編次之勤不可與修等均賞伏乞陛下

收還臣此來恩命只旌賞修以下諸儒庶責賞分明允
愜公議



景文集卷二十八

欽定四庫全書

集部

景文集卷二十九至三十一

詳校官侍講臣王燕緒

檢討臣何思鈞覆勘

總校官候補中允臣王燕緒

校對官學錄臣謝登雋

謄錄監生臣汪國均

欽定四庫全書

景文集卷二十九

宋 宋祁 撰

奏疏

直言對

宋仁宗本紀皇祐三年春三月詔求直言是時祁由龍圖學士復為翰林學士本傳

作景祐

中誤

翰林侍讀學士兼龍圖閣學士宋景昧死言伏以陛下
躬至聖開大明數引近臣廷謀急政退托不敏開敢言

之路日昃便坐以須告猷夫人君據安而念危則終不
危操治而慮亂則終不亂何則幾微之兆成敗之端森
然前判于胸中矣臣向已被詔對所欲言書聞於上未
合明聰陛下赦其無狀再降德音以欲竭盡下情以裨
萬一顧臣敢無辭而對臣聞羣臣之所以有朋黨者何
也由忠邪不早判耳且君子得位必引其類使協濟忠
力不為私也小人獲進亦引其類使扇動聲勢不為公
也君子指小人所引固曰朋黨小人指君子所引亦曰

朋黨君子常少而小人常多此人君所以易惑而難辨也陛下何不質之以事驗之以言其言也陰賊忌害巧為迎合聽之似可用察之而無實小人也其言也質直蹇正多所補益聽之似逆耳察之而有實君子也又以其言驗其人之行事與言合者為忠事與言反者為邪不黜其邪不進其忠則朋黨終不除矣臣下之所以讒佞得行者何也由朝廷言之路太廣也夫正人能言邪人亦能言古者稱言之無罪者謂有道之言也若邪人

構虛以害有位架妄以間忠臣亦以為不可加罪則是
以言喪邦矣且邪人緣隙投詐寄事造奸詆人必以難
驗之文傷人必以似是之語使進不得自辨于主退有
以離間于君于是正人幽憤有功抑退如此者陛下雖
加罰焉可也正人則不然殺焉中立侃焉正論引古今
之宜根刑政之本質之衆則無害措之事則可行不為
勢傾不為利奪如此者陛下雖加賞焉可也故言路大
闕而正言不賞妄言不罰則讒佞終不去矣今議者皆

曰朝廷誠安且治臣以為不然夫三患未去安得為治
直亂之未作耳請試言之夫與賢人謀事而與不肖者
斷之一患也重選大臣而輕任之二患也大事不圖而
小事是急三患也何則賢人必為國計而不肖者專為
身謀為國計者必恃至公故言直而援少為身謀者專
挾己私故喻巧而援多人君不能察之則奸詐行矣子
是言長利者則破之以小害使終不能為利圖大功者
則急之以近效使終不得立功善令方下而謬令移之

矣公議始行而私議奪之矣且不肖之人已不能忠而
忌人之納忠已為不善而能敗人之為善改白作黑以
是為非若朝廷已知其奸不能斥去郭公所以誠亡也
已知其賢而與不肖者並任用之劉向所以獲罪也此
今患之最切者也夫大臣左輔右弼參贊權綱朝訪夕
對彌縫闕漏既以為忠且賢而擢之矣材且謀而任之
矣是宜待之以無貳責之以一心今或指纖瑕采飛語
小則被疑大則賜罷朝為臯夔夕為持机遂令家無全

節人無完行何其有道之世而賢者之乏耶誠任之失其理矣徒使繼至者瞻前畏後偷合取容事存形跡日防猜阻舍國事而不慮苟身謀以自安大臣如此陛下何須賴焉且君視臣如手足彼將以手足為報君視臣如路人彼亦將以路人為報此患之次也聚天下莫急於財鎮天下莫切於兵制四夷莫神於機仕天下莫謹於官今財已匱而不肯計兵甚冗而不能擇機至而不敢謀官濫而不知選而執事者但且計小利害責小經

費羣對而旅前取旨而奉行日徇一日歲偷一歲陛下
又不念此寧是朝廷之福耶此患之又次也假如萬一邊
境有事盜賊相挺甲兵宿野寇餒在路此時三患不去
誰能出身為國與陛下共處安危耶誰能執節慷慨為
陛下前死不顧耶臣故曰非能治也直亂之未作耳陛
下詔中書門下使擇天下之冗官澄清流品詔樞密院
去天下之冗兵寢明紀律斷自宸慮必取成功不使渙
汗復收匪石中轉則縣官之財有數年之饒為萬一不

虞之備策之善者也。機制夷狄，臣前對已嘗具之。猶有可念者，臣聞馬者兵之大也。邊庭之所以常取勝中國者也。今監牧弗謹，將畜無課，而自蕃入中國，既有定價，則駟駿不至，而疲駕實來。地非所宜死者，如積河南河北草地數萬頃，為郡縣所侵，挑田伐樹，半入民產。且中國之兵步多騎少，騎兵利平步兵，險夫自河以北，地若砥平，日與天盡，不見堆阜，此非用步之利也。雖步卒百萬，詎能抗戎馬之出入乎？故莫如養馬與之馳逐，則

契丹懼矣夫馬政修舉牧養得人五年之中可致良馬十萬外可以罷西邊之入中令得與民通市内可以修人心之馳突與契丹爭衡此誠用武之急也臣又聞南方鑛冶地寶不乏但轉運司與州縣莫適為謀昔之本錢數十萬慶歷以來為官司侵耗畧盡矣今既無糧貨不能聚人上下掩閉止以坑穴不發為解采鑿烹煉反為奸人所盜利奪于下貨失于官禁帑之錢日朘月削今若留數十萬緡置于饒信權為本錢精擇材臣委之

經度自今舉吏專建官司庶幾銅溢於山錢流於府此
可以責數年之效未可以驗于目前也銅足錢多此亦
富國之一助耳臣智識庸暗不足上當清問輕率狂狷
惟陛下裁貸其誅

論羣牧制置使

臣伏見舊有羣牧使昔以樞密院一員總領臣以為國
之大事在兵兵在馬今但以兩制以上領羣牧使其于
小臣浮議易為更易若樞密大臣兼總之不惟要見國

馬登耗大數準量騎數所用又免小臣狂妄議論所貴
牧事寢重速致成效

論復河北廣平兩監澶州兩監

按歷代名臣奏議
係嘉祐六年祁為

羣牧使

時上

西北二敵所以能抗中國者惟以多馬而人習騎此二
敵之長也中國馬少又人不習騎此中國之短也每至
敵來作過則朝廷常以所短禦所長是以十戰十負罕
有勝理今議者但欲益兵破敵不知無馬且不能為兵

也用兵七年終不聞講牧馬之制此寧朝議未之思乎
今羣牧司管河北凡十監其五監畜孳生馬五監畜大
馬然未嘗有數登十萬匹者何其弱也今河北沿衛相
北京五監之地皆水草甘涼可以蕃息但官非其人不
能盡法牧養何者馬數雖增未之賞馬數雖耗未之罰
急則括買民馬苟以充數既不可用徒有芻秣之費驅
之邊境未戰而凍死者十八九矣又聞河北沿州廣平
舊有三監今惟一監存焉欲望朝廷差有智識近臣按

求舊地復為三監澶州舊有東平監水草地氣與洛相
一體亦可興復此二監合河北五監通為十監每監以
一萬匹為定額如國家牧養得人則五年之間可以自
養及額餘數則可以分入河南鄭許西京三監及在京
騏驎院天駟天廐諸監坊矣同州沙苑一監地尤宜馬
令卻只畜大馬不令孳育殊乖所宜欲望朝廷許將孳
生馬五千就沙苑分左右兩監委官益占官地謹加牧
放五年之間亦可得數萬七年之後可支陝西沿邊諸

州戰馬之闕矣

又論京東西淮北州軍民間養馬法

河北陝西河東出馬之地民間皆宜蓄馬而近年黔中
土兵已多耕農數少難行民間養馬之法伏見京東西
緣淮北州軍地不純熟馬之種類與北馬小異若令民
間養馬朝廷緩急差可濟用臣今畧為養馬法如下

一民間能養馬二匹者免半丁科率三匹者免一丁五
匹者免三丁仍州縣不得尋常專擅差借具有第一等

第二等二戶全無丁者勒養馬三匹一丁者勒養馬二匹其力及一丁養馬戶比有丁養馬戶免一半科率

一所養馬州縣為立籍許令提點刑獄與知州一歲一閱以知實數如有死損仍委本戶置買及數

一民間如有力及人戶能養馬及十匹以上其戶下科率十分與免七分

一所養馬不得夾帶川蜀淮馬至小怯者充數並須堪任負載者

論養馬劄子

案歷代名臣奏議以下四首俱係嘉祐六年祁為羣牧使時上

臣等近知河北孳生諸監馬例各低小不堪戰陳蓋自來馬種雜亂或翁大母小或翁小母大配放時不曾揀別是致無由生得高大好馬實恐緩急有誤諸軍分配昨有判官寇平因點印時曾揀好翁母馬七百餘匹送淇水第一監別立羣分配放已準宣命施行續據都監李知和乞于逐羣內揀出五匹大馬破草養餵好母馬配放又蒙宣命許依臣等參詳逐官各見用心揀別馬

種然終是未得盡善今欲乞將孳生監與一例分作二
等其骨格高大堪充戰陳者為上等骨格低小有諸色
病名者為下等各別立作羣分配放仍令草地相遠不
得交相混雜如此必生得駒口格式入等堪任披帶至
于雜馬亦自無闕用其自今以後生得駒子亦便依此
揀別各歸等第內上等馬翁並乞依冠平等奏請于不
配放時破草料上槽養餵所貴及時遊放不至羸怯兼
臣等不住將諸州上京馬內揀選迭格好翁母馬小作

番次逐旋差殿侍押赴諸監如此分開等第不出三年
必須大改收得迭格駒口以備戰陳取進止

又乞養馬劄子

臣頃年為羣牧使其時曾擘畫欲于諸監市母馬合見
馬共成五七萬匹一歲大約得駒五萬不出五年得二
十五萬就中破死損十分之二得駒二十萬于二十萬
中選出負馱馬十分之五得戰馬十萬匹以為中國有
此馬可與敵人相馳逐使聞風畏威不敢有窺邊境意

是時西事已定朝廷求安便忽畧此事有司指摘臣奏以為迂濶但言放牧之地侵損民間膏腴田疇有損無益于是寢廢且馬者兵之本倉卒求之不可得若無事時歲月孳養臨事自無關乏臣欲乞選左右名臣議羣牧養馬法收還牧放舊地多列廐庠檢詳新舊條約擇取便宜如臣所請且為新制及罷河東陝西馬禁許民間與番落自相貨買及許天下民養馬勅州縣不得計在貲財之限其牧馬臣且以十年為期若歲歲滋養當

得二十萬匹而天下百姓所養馬亦益多假令西北二
邊敢為風塵則我兵足馬健與之角戰誠不足畏取進
止

帖黃云今天下馬軍大率十人無一二人有馬而所習
伎藝與步兵不同緩急不堪移充步人使喚使軍人無
馬是國家虛養此兵有名無實又云臣舊知牧馬數不
多于中選取戰馬即今數目益少此事為用兵之切務
伏乞朝廷深以為意

論買馬劄子

河北孳生監馬母數少逐年有妨滋配勘會麟府州馬最宜孳生准先降條貫其馬作五等收買第一等一十八匹端至第五等各減一匹後來宣制于逐等上例各減絹二匹第一等馬見今只有十六匹端蕃漢興販人戶別無利潤致騾馬轉少竊恐諸監每年漸見孳茂闕額有悞將來支配諸軍本司今相度其麟府州所置五等騾馬欲乞權于舊條未經減絹收馬五等價內將第

三等以上各特添絹二匹第四等五等各特添一匹仍
令逐場買馬及三五十匹旋計綱上京赴估馬司交割
從本司再行揀選埒為好馬雜馬兩等轉送孳生諸監
添助蕃息臣等又見漢武帝時為將軍騎馬少乃令天
下諸亭養馬歲課孳息即知權宜立法古今一體如將
來諸監母馬數足即卻依元降條貫施行一則招來興
販人戶將好馬中官二則三數年內孳生駒口漸多準
備緩急支填戰馬無闕取進止

又論養馬劄子

階文州買到省馬舊來牽送上京近因本司擘畫奉聖
旨並令送陝西轉運司支配諸軍關馬伏緣今來孳生
諸監闕少上等馬翁馬母蕃息駒騾本司相度欲乞今
後階文兩州買到第一第二等馬內如有迭標格好結
裹及事藝別無病名堪充作馬翁馬母委自本州長吏
躬親揀選十歲以下者令依舊押送上京于估馬司交
納從本司填配諸監其餘揀退不入今來色額者自依

近降條貫施行取進止

議西人劄子

臣伏見趙元昊遣使進納誓書西人在館以待答報伏
知朝廷議欲降詔遂相開納止留冊命未便舉行又聞
俞青使回北庭謂本朝若必行元昊封冊勿令使命深
入恐契丹兵馬一例殺傷又其答書有俟平定西鄙遣
人來報之意此皆含糊未決之辭包奸蓄怨之語也臣
愚不敏不知大計竊謂機危之會理須審思事脫一失

悔將難救且西北二敵連兵構難中國之利也方當整
勒兵馬陰拱高視候其大傷小亡乃可以逞今若便許
元昊同其誓文則二國要約固已先定不待封冊方正
君臣如此則元昊之貢獻必且續至朝廷之金幣亦便
頒分假使北敵能勝西則契丹必歸曲朝廷以為撫彼
叛臣逆其來信負力悖慢勢必稱兵而元昊得朝廷誓
詔必且取重外鄙市怨耶律肆其狡獪因為間謀得我
金幣以救敗亡是乃紓敵禍于一時嫁外怨于中國矣

使西能勝北則二敵之怨必深契丹士力更當讐蹇則
朝廷卻與元昊歡盟厚賂安得不動敵情哉契丹之怨
朝廷益深則元昊之結朝廷益固者非謂與我為金石
交也彼藉我之賄假我之援全境激敵以誓劫我使吾
邊戍束手瞪目熟視流散不得侵畧然後首鼠窟穴養
成豹虎斯其謀也臣又料契丹未能得忠于元昊先且
取賞于河北避強擊弱有何不可是朝廷免西鄙之小
衄結北方之巨釁輕重之擇安得不懷且契丹言恐一

例殺傷又云俟平定西鄙此何等語朝廷忽而不計即臣伏見元昊誓書中要結天地誓及子孫言雖夸險勢亦窘急何者彼蓋迫契丹之用兵畏我境之乘便畧其邊寨取其老小重以詛誓務在速成必知朝廷已賜開許不肯先違誓信則彼一心捍北永無東顧之虞此賊昊之計事在目前確然可辨臣以為當今計者不如且遣彼使賜以存問詔書詰難誓文更令修正遷延來往以賒後期兼令雄州騰報北帳俟其雄雌之決更議拒

納之宜撫西懷北兩得其便伏望畧回聖慮一賜裁擇
取進止

乞宰相監修唐書疏

集歷代名臣奏議係仁
宗時祁知成德軍時上

臣先奉詔修定唐書是時賈昌朝罷執政丁度以參知
政事嗣總其任度比罷免而書局不解今度不幸薨謝
臣又遠守邊郡本局止有刪修官王疇以下四員至今
編纂遲延紀志俱未有草卷誠恐書無統制諸儒議論
不一淹引歲時欲望朝廷許依前例以宰相監修竊以

一王大典垂法千古功且垂成而其間褒貶是非出
史臣等須藉當國大臣商確訂正為斯文之重庶書成
行遠無愧前人唐特修晉氏一史亦宰相恭總彼偏方
陋國制度殘窳尚以輔弼領之比今唐書恢大光明為
不侔矣伏乞特賜詳度施行

請復唐馱幕之制

案歷代名臣奏議係皇祐四年祁知威德軍時上

臣聞唐時出師用兵每什為五馱法馬牛任從所便其
間隨行什物鍋幕之類皆具故師行萬里經亘歲月無

所關之自五代之亂更相侵擾其兵不出中國弱者輕
齎強者因糧遂失五馱法至今相承不復討尋臣伏見
朝廷之制每指揮五百人指揮使得夾幕一具副者得
單幕一具馬軍得葉鍋布行槽等若干步軍得鍋若干
自軍員以下更無帳幕或出次野外雖甚風雨亦無所
庇又戰士被甲所將衣衾悉自負荷馬軍則孟杓之類
悉在馬上然則行數百里人馬強力皆已先疲脫若逢
賊安能挽蹋擊刺與爭勝哉故無幕帟則士卒無所休

庇無馱法則士卒須自負荷此于軍戎亦非小害臣乞
詔近臣檢求唐馱幕法下殿前馬步軍司議可復與否
明條利害上稟朝廷指揮

論復監地必有羣臣以百姓稅地為言

國家今廣置騎軍而無馬給之騎軍所習既不可為步
則是數十萬衆無所施用常坐費糧廩而與無軍同也
臣固以為不如復監地多畜戰馬以給其用計之便者
也凡監地有及千頃五七百頃者其間附山包野陂澤

芟草非耕種之地今若復之則羣臣浮議云害百姓良
田使農不得耕種臣以為不然假使牧馬之地一監有
五千頃皆為稅田國家所收歲未及數萬石以數萬石
之粟于軍之虛實未有所益也使有牧馬數萬匹則三
軍之氣可以坐增由是言之國家急須軍馬之時難良
田尚可變而為牧田況今之牧地非盡良田者乎臣伏
見洛陽單鎮兩監曾廢為民田議者知皆以地之肥美
及經一二年民之佃不及一二百頃其餘盡為荒野無

人請佃牧地之中樹木數千萬株皆為百姓所伐販賣而官司明知上下相蔽不為糾發俄而却復此特偉人邀一時之利議者之過此則監地興廢之一驗事已見前惟國家詳酌而行

上便宜劄子

按歷代名臣奏議係皇祐五年祁知定州時上

右臣伏念行年五十有六素自衰怯不逮人宜內治一郡習刀筆簿領計校米鹽與俗吏爭課最以報萬分不意陛下過聽乃使守邊居真定不半年徙定武任過所

能早夜震惶然常聞天下根本在河北河北根本在鎮
定以其扼衝要為國門戶且契丹所欲得者惟定與鎮
二軍不戰則進薄深趙邢沼咋脆撞虛無有患矣臣所
以日夜深計者以為欲兵之強莫如多穀與財欲士而
練莫如善擇將欲人歆艷樂戰莫如賞重而罰嚴欲敵
顧望不敢前莫如使鎮重而定強夫恥怯尚勇好論事
甘得而忘死河北之人殆天性然陛下少勵之不憂不
戰以欲戰之士不得善將雖鬪猶負無穀與財雖鎮金

城定湯池勢必輕今朝廷擇將練卒制財積糧乃以陝西河東為先河北為後非計也夫西戎兵銳士寡能畧邊不能深入河東天險敵憚為寇惟河北不然失長城之防自薊而南直視千里敵鼓而前如堯社上行故曰謀契丹者不得不先河北謀河北舍定與鎮無可議矣故臣願先入穀鎮定鎮定已充可入穀餘州列將在陝西河東有功狀者得遷鎮定則鎮定重天下久平馬益少臣請多用步兵夫閑然聚霍然散雲奔颺馳抄後掠

前此馬之長也強弩巨挺長槍利刃什什相聯伍伍相
遮大呼薄戰此步之長也臣料朝廷與敵相攻敵而去
之及境則止然則不待馬而步可用矣臣請損馬而益
步故馬少則騎精步多則關健我能用步所長雖契丹
多馬無所用之夫鎮定一體也勢不可離今判為二恐
謀之未詳自先帝為一道帥專而師不分故定堪其胸
則鎮擣其脅勢自然耳今其顯然有害者屯寨山川要
險之地裂而有之平時號令文移不能一敵脫叩壘則

彼此不相謀誰肯任責耶臣請合鎮定為一路願以將相大臣領之無事時以鎮為治所有事則遷治定指授諸將諸將權一而責有歸無苟且意策之上也惟陛下與中書樞密院當居安慮危熟計所長必待事至而後圖之殆矣河東馬強士習善馳突與鎮定若表裏然東下井陘不百里入鎮定矣敵若深走以河東健馬佐鎮定兵掩契丹之情若歸者萬出萬全此一奇也臣聞事切于用者不可以文陳臣所論增步兵及入穀分兵諫

裨將等諸條件目繁碎要待刀筆吏委曲可曉臣已便
俗言之輒別封上至擇善將多蓄財乞委樞密院三司
條具以聞臣一諸生弗知軍旅事偶有所見不敢隱特
以受大恩思亟報也恐議涉迂暗有司疑詰更乞付臣
令悉意條陳然後施行

景文集卷二十九

欽定四庫全書

景文集卷三十

宋 宋祁 撰

奏狀

繳進升祔慶成詩狀

右臣等伏見今月九日章獻明肅皇后章懿皇后升祔
真宗廟室禮畢者懿烈順躋慶儀交展恩流即日歡懌
縣區恭惟皇帝陛下凝命宅中協華稽古雖誕敷于一

德常有懷於二人向者闕寢別祠翠華躬謁依違累歲
博徇羣臣之謀稽合靈心用舉先朝之舊制書前降典
冊嗣宣遂自儀坤之廷竝升清廟之祐緣情得禮因孝
示人回曠蕩之洪私顯劬勞之永報鑑奩易其交深顧
復之思牲俎薦芬足慰蒸嘗之感臣等共塵法從參攝
事經仰欽陟侑之儀難默揄揚之素謹各撰成升祔慶
成詩一章繕寫別封上進干冒宸覽無任省循媿汗之
至

南郊乞異姓恩澤狀

右臣幸班禁近獲邁光華凡再侍於明裡得推恩於異族敢援新制以寵私閤伏念臣有舅進士朱某幼習儀文世承紱冕未預鄉華之薦久懷家食之慚以臣永嘆渭陽希榮母黨願筮仕途之藉以光孝治之辰誓罄涓埃共期酬補

南郊陳乞男彥國恩澤狀

右臣籍塵禁秘身託近藩天饗在辰職來預慶緣從官

之舊比有任子之公條輒忍覲顏更申妄請切以臣男
彥國甫當蒙孺粗訓義方未專一業之勤遽覲千齡之
盛不能自達庸丐賞延幸當朝需之覃冀預士名之食
儻榮于嗣獲寵而家願交勵于朴忠得參酬于覆育丹
愚所誓殞踣無忘干冒宸嚴臣無任震惶俟命之至

乾元節乞男定國等恩澤狀四首

右臣叨華禁從逢聖誕期輒丐餘榮更延賤息伏念臣
有男試將作監主簿定國久踰冠齒粗習儒猷向因臣

兄以猶子之親得參士食逮臣蒙持橐之列已及蔭條
顧緣試秩之初未齒為真之籍敢因盛節就冀仁恩庶
獎穉蒙益敦義教省身可勉收報為期

右臣叨服近聯慶逢誕節例容任子情切庇私內揆干
踰舉臻震懼伏念臣有男試將作監主簿靖國甫當羈
引纔習藝文向緣世父之榮已參蔭籍之末逮臣冒寵
自獲推恩敢因星渚之辰更丐童衿之幸許從真秩俾
獎蒙姿誓忠教之日勤答上天之仁覆慙愚內勉頒越

為期

右臣久玷凝嚴訖無云補尚因誕聖之日敢援任子之
條仰竚恩華俯私舐愛切以臣男惠國年方齔佩習始
書觚未克辨經稍任典謁屬羣臣之上慶顧賤息以自
憐距躍所逢推求例賞倘童蒙之擊志獲孺筮以聞榮
共勵竭忠歸酬再造

右臣久塵法從均服朝禧每緣慶於誕辰許推慈於蔭
籍內惟丐請有懽情願切以臣男輔國甫在童羈未從

傳習雖教之執卷而未能負薪不勝私懷願從舊食辛
電樞之紀節徧荷橐以頒恩冀啓任階以獎家訓如牛
舐犢幸慰於哀悰雖犬若豚敢期於有立共圖忠瘁上
答恩仁

讓翰林學士狀

案本傳祁以龍圖直學士知杭州留為翰林學士在慶曆三年

右臣今月十三日準閣門承受韓文昭報告為已除授
臣翰林學士今授告敕者聞命側躬既榮且駭切念臣
昨知制誥日以經夏抱疾願守便藩本冀寧后得養羸

欽定四庫全書

東坡集
卷三十一

四

喘俄叨改職尋以敘辭比令兒息搬取家屬伺其歸室
偶未赴官僚反具知宰府同亮今者忽蒙誤選升備禁
局文翰近班臣子至願當不俟駕即日造朝但念臣因
病自言蒙恩輒止不惟欺冒朝聽必恐滋致人言便謂
臣巧作遷延陰規次補有妨賢路專取身榮啓偷競之
風瀆承平之化一罹斯謗容得自安伏望皇帝陛下察
臣外補有恩亮臣知分有素且依前詔早遣出麾況餘
杭闕官已逾三月學士供職自有數人若得申沛俞音

收還新命憫孤蹤之羈悸息浮議之紛囂上穆朝僉下紓憂悃雖停褒澤自荷大恩無任祈天俟命戰懼之至

再讓翰林學士狀

右臣今月十五日準中書劄子以臣陳讓新除翰林學士告敕乞且赴杭州奉聖旨不得辭讓者恭聞敦敕參忤誠悰貸其輒辭畧以嚴旨便當奔走朝路冒卽寵章誼有未安不容無訴伏念臣今年三月內以天章閣待制歸朝尋蒙改知制誥又于七月中因陳乞外郡蒙轉

龍圖閣直學士無勞被獎自臣為始尚錄餘杭舊例未
速人言臣是以上殿敘辭日乞在任滿二年成三十月
依常參為例冀圖考績少答睿私不意今者再被制書
擢臣為翰林學士此則一歲之內三次遷除緡典蕃數
未有臣比一介之操知分甚明若便懼命忍慙覲然祇
受悠悠仕子偷競同興雖微臣苟一日之榮而廣朝被
多士之議損大益寡顧不重哉今拒詔當誅昧進亦罪
罪無足憫誅有可矜敢率愚誠罄叙茲窘伏望聖慈特

許收罷新命且令赴任杭州控仁援天更無別理如朝廷必以學士院乏人不令辭免則臣願只以內閣職名作直學士院供職俟滿年歲方冀敘遷二事之中乞賜矜允臣無任虔祈懇禱之至

審刑院斷絕公案奏狀

案祁知審刑院據神道碑在康熙四年

右臣據大理寺狀申日奏司今月日以前送下公案竝已斷奏訖無見在者舜刑惟恤漢讞號平屬九夏之清和訖四方之論報至仁丕治中典著聞允非甚盛之期

疇臻幾措之會恭惟皇帝陛下燭知治總懋建民彝受
文日之奏封謹齋居之閑實軫人命之重容有不經詔
天下之平許從中覆至于法防素具吏禁易遵示以簡
孚之嚴窒其旁緣之隙懿條交舉庶獄寢希甫當時燠
之初靡餘決事之請畫冠斯格本上德之好生丹筆屢
停顧攸司之何力臣誤膺審克祇覲熙隆願咨繫月之
文備著約章之簡聿光在宥永照方來

謝對衣金腰帶鞍轡馬狀

右臣伏蒙聖慈以臣加前件職特賜對衣金腰帶一條
金鍍銀鞍轡馬一匹者經幄詳延甫塵于祕職規庭霑
賚更藉于殊私內撫肝膺舉臻榮腴竊以解衣示寵莫
美于漢臣錫馬從游最榮于唐世而臣仰丁盛旦早服
華階因槌句之備員侈除書之在始方其伏謝敕以頒
分煥紋襲于襜裳爛鈿環于搢帶材駒半漢釵轡玲瓏
惟賜予之兼常實芻微之增詫誓當夙夜祇力造次為
仁俯觀珮璫之長參惕乘軒之貴有如皎日無忘茂恩

又

右臣伏蒙聖慈以臣入院特賜衣一對金腰帶一條金鍍銀鞍轡馬一匹者近司被召錫品霑華祇受寵頒叢臻媿緒恭以命賜之設眷厚是將安吉美于詩人蕃庶表于侯象洪惟聖世務尚前猷美禁署之始除煥儒林之新式因其衆謝侑以多儀筭服裁鮮鏤金飾具斥衛鞍之寶鉸解材駟于天閑下拜神墀爛盈私室而臣猥從末至甫望清光視書詔以未能假跼章而太甚人斯

誤舉已無收汗之期賞復冒叨安道濡鵜之訛誓堅盡瘁少答詳延

又

振擢云初頒分有典恩雖將意媿不容顏伏念臣久去
嚴深弗專辭贊蒙收還于玉署復修潤于緡言而佶儻
塵容支離病骨謀無故勇貌有新衰方深舊貫之慙更
侈多儀之貺襲衣聯褚梁帶橫金侑以材駟副之寶鉸
雖朝稽成式本優待于峻良而士有冒居迺例蕃于錫

予仰循異渥內揆無堪服以光軀慶揖私之有煥乘而致寇惕觀象以蒙譏荷寵兼常撫衿充感

又

右臣伏蒙聖慈以臣前件職特賜衣一對金腰帶一條金鍍銀鞍轡馬一匹者侈袂光軀寶釘照筭斥內閑之半漢副釘鉸之精良併侑茂恩庸褒近職胡寧輜幘遂忝頒分伏念臣本以避親特蒙換秩始踐鳳阿之祕方陳鳧藻之歡而朝循舊章賜存成式匪為人而廢禮姑

異數以勸能麗服橫金爰重寘行之寵材駭耳轡居為
執御之華被錫于茲撫躬何幸儻屯愚之可勉圖尺寸
以為酬

定州謝對衣金帶鞍馬狀

右臣準中書劄子以臣除前件職奉聖旨賜臣對衣金
腰帶鞍轡馬仍差殿直李宗偉就定州給賜者寵名冒
進賜品臨頒使者發齋邦人改觀伏念臣年塗衰遠襟
府塵蒙違去清廂保障窮塞報政無日待罪再茲本緣

假節以非真宜與過更而皆罷迺蒙皇帝陛下垂矜久
成特改近班因加秩之命云初舉有分之錫惟舊襲衣
圍帶鈐轡名駒本三朝之餘珍重兩驂之私駕曳馬稱
體知露冕以非榮乘以按屯遂據鞍而忘老撫恩云厚
有殞為酬

讓敕設狀

伏覩仲夏以來苦雨為瀾河流泛濫民堵墊傷上惻睿
襟分馳羣禱方交修于至德將迎召于太和臣比荷顧

存召還禁近蒙循舊體盛錫宴羞旣親耳于焦勞難自
私于樂衍願停慈渥以適事宜其敕設欲望特許寢罷

謝班次狀

案祁于慶歷五年罷翰林改龍圖八年復翰林此狀與下謝宣召皆是時

右臣準中書劄子奉聖旨令立班在張方平之上者因
舊蒙榮沿恩進等懇辭弗聽媿切參懷伏念臣術學空
單年姿衰槁自違禁署四易歲陰絕窺鈴索之華寢忘
赫蹠之式屬無嫌避再沐召歸合賓下陳以從甲令而
方平等更因近例追叙前功屈朝次之明規崇仕途之

美讓沔煩諭詔俾進上聯畏再瀆以取訶輒慙而就
著以新訂故誠非素杼之長雖去卽還遂竊塞人之福
仰銜垂睿曷用仰酬

謝傳宣撫問狀

右臣伏蒙聖慈特降中使傳宣撫問者冒寒得疾積損
成虛伏枕迷魂偃牀在告尋交薦于惡石冀自救于殘
軀迺蒙皇帝陛下齒記不忘慘矜過厚特迂使驛傳諭
玉音許輟高手之良以濟負茲之困恃大恩之下屬庶

營魄之重還自此更生盡歸論報

謝宣召入院狀

命節及門褒綸在耳臨聞振擢交腴榮慙伏念臣素稟
朽疎親逢昭泰由累勤于舊史獲通籍于從官深入玉
堂慎司雅告無能云補第慙于空餐有諉攸箴已當于
襍被會臣兄庠猥叨貳政例合避親亟用請閒懇祈去
職尋蒙可報對易美名跂華閣以通班仍露門之擿句
宿官少責用拙正宜安于之筆遂乾絕聞名命裨謀之

草雖在無復討論適以樞務缺員昆親補乏垂矜舊物
靡涉他嫌復收液櫛之材入齒禁林之綴矧違近密回
貿寒溫其間緣疾召衰乘憂失壯學殖逾落辭緒若抽
心忘五誥之醇目眩十行之細曷以再承大對參潤遠
猷深惟洊至之華抑本千齡之會斯蓋皇帝陛下仁無
頗覆惠等曲成眷去馬以還駢激倦禽而重翥寵光完
士歆豔羣倫尚當景式前修擇尋故業漢風彌郁冀循
爾雅之規蘧齒已高況屬知非之素撫躬揆遇濱殞為

酬

授知制誥舉歐陽修自代狀

右臣蒙恩授臣依前官知制誥準敕舉官自代者伏見
太子中允集賢校理歐陽修志局沈正學術淹該棲遲
懷寶不詭所遇措辭溫雅有漢唐餘風如得擢在禁垣
委之潤色必且粉澤王度布于四方觀言責實臣所不
及願回授受以允詳求

授兼龍圖閣學士舉施昌言自代狀

右臣竊見天章閣待制施昌言識遠慮遠見推倫輩歷
司繁劇沛若有餘尤宜蒙三接之召備萬乘之器材能
已試臣且不如願改恩章以允朝渙

舉楊安國自代狀

右臣蒙恩特授前件官依舊充職準敕舉官自代者伏
見天章閣侍講楊安國質厚淵懿邃于經術勸道帷幄
有裨大猷循名責實過臣遠甚乞回清授以穆朝告

修撰舉趙師民自代狀

右臣蒙恩特授史館修撰準敕舉官自代者伏見尚書
祠部員外郎天章閣侍講趙師民性理沈敏恬于榮進
博記多識殆無比倫據經援古措辭雅健推名責實臣
所不如乞回甄授稱是惇碩

授諫議舉魚周詢自代狀

右臣蒙恩特授諫議大夫準敕舉官自代者伏見天章
閣待制魚周詢外和內正不憚強禦頃排異議辨正誣
寃毅然風采聳于朝路臣嘗景仰美行心服其長願回

恩典以光賢舉

授翰林學士舉高若訥自代狀

右臣蒙恩除授翰林學士準敕舉官自代者竊見前天
章閣待制高若訥資性謹厚文詞淹敏值物照理物無
虛情與臣偕第同班給其履尚若擢寔近署足潤大猷
願回新命以光清授

再授翰林學士舉官自代狀

竊見某官志尚冲遠風局精強久次詞垣晚成國器材

望旣出臣右年輩亦在臣先願還濫及之恩回副類能之選

授兼侍讀學士舉張錫自代狀

右臣伏見天章閣待制張錫安節懿行講貫如流進侍經席有助咨問願回新命以光崇簡

授待制舉賈昌朝自代狀

右臣伏覩先降敕節文每授官許舉官自代者竊見司封員外郎天章閣侍講賈昌朝學優文敏操履堅正質

其望實過臣遠甚乞回茲授以允公言

薦劉絳狀

臣伏見應茂才異等科劉絳生于遐遠系出寒素結髮從學逮冠有成研覃六籍上下千載多所論次頗有指歸固窮守道不祈詭遇向緣就試六論文限敦促偶因小誤被黜有司生平襟蘊有所堙閼絳嘗著春秋三傳析要并皇極書凡四十五篇皆鉤撫幽奧會萃異同思排異端取質先聖據其揚推信足多尚按絳行年方二

十有五若令齒德寔茂藝術益深必能擬迹惇儒自名
所學欲望朝廷特許收試授一直講職名俾在國庠敷
述經旨養成令器進備譽髦其析要皇極等書謹同封
取進止

薦張定方乞收試狀

右臣伏以良工構材為厦明主構士為國而材湏求集
士待舉知然後落成展采功與時立伏見應沈淪草澤
科張定方年三十八歲識慮沈敏氣直行範文尚體要

不工聲病涉知輶略兼明遁式甘足貧槁久無仕心昨
為鄉黨敦推入應詔舉六論程藝非其素心有司報罷
怡然引去閉關卻掃不干州閭立言忼慨指摘民弊臣
知壽州日以禮致問延至公門觀其議論卓焉切至因
取其所著書得卻敵復戎戰書等篇質多采少紀實求
當臣亦指文索事與相辯詰觸機應變籌策有餘非但
角空言競華論而已臣以為如定方等輩不可多得或
蒙召赴上都程其所長授一職事官令往西北邊郡必

能研究術畧參贊帥臣討論營陣商推攻守至于撥煩
幹蠱又有緒餘臣既知其人不敢有蔽謹錄定方所著
三軸并封上如有可采伏乞特賜收試果無所取臣甘
苟言之罪

乞知亳州狀

右臣竊以為君務達下情為臣貴在無隱雖有煩請猶
不蒙誅臣之數懇正託斯義伏念臣福庠材下為祿所
浮行年四十便若衰憊纏綿宿疾出入五年氣迂脾倉

陽客胃府觸暑犯寒則飲食頓減溫中竇下則藥艾未
良自念綿疴屢求外補昨領壽陳兩郡凡一歲有餘旣
便養頤漸克強勝不期戎帥內鎮蕃方臣蒙恩入朝歡
喜上道庶能自力還服近班遙叨書命寢華名級而延
悴之質果未遑安舊痼有源新疾復動春夏之際瘞劇
無常舉家竭急時煩省問羸露有素班列具知自非出
守胡能寬疾臣伏見亳州去都至近總務非少亦須選
任俾往撫綏欲望聖慈許令臣知亳州一任臣雖質課

計最有惡吏師然恪奉詔旨謹察邦政于下流之比尚
有一日之長幸其餘閒盡力治料儻蒙帝力為天所支
耗氣稍完迷魂來復尚更求自試無憚諸煩涓埃萬一
以圖云補今茲祈叩寶迫庭殘言拙少文止冀矜遂

乞解鄭州還京求醫狀

右臣伏以臣子危急必于朝廷祈君父雖誅避在前不
敢避也伏念臣自去年五月脾胃寒泄服暖藥過度虛
風客熱結成沈疴發歇不定經一年有餘臣以所領州

路當兩京衝要誠欲盡瘁死節官下是以不敢請假牽
勉勾當偶無曠敗昨自六月中寒瘡頓作不復支持經
四十餘日飲食減少出廳不得肌肉銷盡惟有皮骨左
腳麻木行履艱難情志昏塞委實勾當不前遂于七月
二十一日牒公事與本州通判管勾已奏聞訖人情病
未及死須思治療伏緣外州難得醫藥坐待死亡臣欲
望聖慈念臣從川途替歸往復萬里年老病甚將就湫
然特許解罷鄭州令還京師就求醫藥以救殘喘或得

一閒慢主判司局所貴易得假告休息衰骸萬一疋殘
之軀未填溝壑再得陪服朝序卽異時朝旨別有差遺
不以遠邇聞命卽行以答陛下再生之賜

景文集卷三十